

Naija - Salvashon God Wod - Salvation Scriptures

**Efisos 2:2 bikos una dey du wetin di wold wont. Una dey obey wiked pawas
wey dey rule di air and kontrol stubborn shildren.**

**Matu 6:10 mak yor Kindom kom, mak wetin yu wont, hapun for dis wold as
e bi for hevun.**

**Luk 22:42 "Papa, if Yu laik to du-am, mak Yu let dis sofa-cup pas mi. Bot
mak e bi as Yu wont, nor bi as I wont am."**

**Jon 16:7-9 "I tel una tru wod, na for una own gud naim mak mi won go,
bikos if I nor go, di Pesin wey go help una nor go kom, bot if I go, I go
send am kom mit una. 8 "Wen e kom, e go show pipol for dis wold wetin
sin, God raitiousnes and God jojment, bi. 9 "Di Spirit go show dem sey
dem dey wrong abaut sin, bikos dem nor biliv mi.**

**2 Sekon Timoti 2:10 So I dey redi to bear di sofa, as long as e go save doz
wey God don shuz insaid Kraist, wit glori wey go dey foreva and eva.**

**Roman 15:20,21 Bot I laik to prish di Gud News for wer pipol nor no Kraist,
so dat I nor go build haus on-top anoda man foundashon, 21 jos as God
wod sey; "Doz wey dem tel abaut am, go si-am and doz wey neva hear
abaut am, dem go undastand."**

**Apostols 2:36,37 "So Izrel pipol, mak una no sey, God don turn dis Jisos
Kraist wey una kil, to bi Oga and Mezaya." 37 Wen di pipol hear dis
prishin, e trobol dem for maind wel-wel and dem kon ask Pita and di res
apostols, "Awa brodas, wetin wi go du naw?"**

**Hibru 4:2 Bikos dem prish God wod giv us, jos as dem prish am giv dem tu.
Bot dem nor tak am serious, bikos wen dem hear am, dem nor gri biliv
am.**

**Jeremiah 24:7 - Matu 22:37 Jisos kon ansa, "Mak pesin luv God wit all en
heart, wit all en soul and wit all en maind.**

**Apostols 16:14 E get won wuman wey dey listin to us, en name na Lydia
and e kom from Tiatira. E dey fear God wel-wel and dey sel purpol klot.
God opun en heart to biliv evritin wey Pol tok.**

**Matu 13:14-16 "Na dis tin mak wetin Profet Isaia tok hapun, 'Una go listin
wel-wel, bot una nor go undastand. Una go luk wel-wel, bot una nor go si
enitin, 15 'Dis pipol nor go fit undastand; dem nor won hear enitin, dem
klose dia eyes mak dem nor for fit si and hear wit dia ear, dia maind don
blok, so dem nor go fit undastand, bot if to sey dem fit turn kom mit mi, I
for heal dem.' 16 "Bot God go bless una eye, bikos dem dey si wel and
una ear, bikos dem dey hear wod.**

**Isaiah 6:9,10 - Apostols 28:27 'Una heart nor dey undastand, una ear nor
dey hear wel again. Devol don klose una eye, mak una nor for fit si; hear**

wit una ears or undastand wit una heart, so dat una nor go fit turn kom mit God, mak E for heal una.'

Mark 4:11,12 E kon tel dem, "God don show una di kindom sikrit. Bot doz wey dey outsaid God Kindom, na parabol e bi for dem, 12 so dat dem go dey luk, bot dem nor go si, dem go dey hear, bot dem nor go undastand and dem nor go fit turn from dia sin kom mit God mak E forgiv dem."

Jon 12:39,40 As di pipol nor fit biliv, naim mak Isaia tok anoda wod sey, 40 "God don blind dia eye and mak dia heart strong laik stone, so dat dem nor go si wit dia eye and undastand wit dia heart, so dem nor go fit kom mit mi, mak I for heal dem."

Roman 11:7,8 Dis min sey, na onli few pipol for Izrel fit get wetin all of dem dey faind. Di res nor gri listin to God, bikos of dia stubbornes, 8 jos as God wod sey, "God mak dem foolish sotey dia eye nor dey si and dia ear nor dey hear til today."

2 Sekon Tesalonika 2:10,11 E go yuz wayo disiv doz wey go perish, bikos dem nor won luv and respet di trut wey for save dem. 11 So God go mak dem disiv dis pipol wel-wel and dem go biliv dia lai-lai. 12 Den God go distroi dem, bikos dem enjoy sin insted of di trut.

Matu 13:18-23 "So, mak una undastand wetin di farma parabol min: 19 'Wen pesin hear God wod and e nor undastand am, di devol go kom tif di wod wey dem plant for en heart, dis na di sid wey fal for road. 20 'Di sid wey fal for sand wey get big-big stone, na pesin wey hear di wod kon risiv am wit joy, 21 bot di sid nor get root, bikos di wod wey e hear nor strong for en heart, so wen trobol kom, e nor go fit bear-am. 22 "Di sid wey fal for shuku-shuku, na pesin wey hear God wod, bot wahala, long-trot and to kwik get moni for dis wold kon shuk di wod die for en heart and e nor kon bear frut. 23 'Bot di sid wey fal for beta groun, na pesin wey hear and undastand di wod. E kom bear frut wey rish ondred, sisti and tati.'"

2 Sekon Korintians 3:15,16 So til today, enitaim wey dem read wetin Mosis rite, somtin dey kova dia maind, 16 bot wen pesin turn kom mit God, dat tin go komot from en life.

Hosea 11:3-7 - Matu 11:28-30 "Una wey don taya and kari heavi load, mak una kom mit mi and I go giv una res. 29 "Mak una folo mi and learn from mi, bikos I gentol, I nor dey kari bodi up and I go giv una peace for una maind. 30 "My way eazi to folo and my load nor heavi to kari."

Apostols 26:18 so dat yu go opun dia eyes mak dem for waka komot from daknes enta lite. Mak dem komot from Satan hand, go mit God, so dat God go forgiv dem dia sins and dem go folo di pipol wey God don mak klin, bikos dem biliv am.'

2 Sekon Timoti 2:24-26 Pesin wey bi Kraist savant nor dey kworel, insted e must dey gud wit evribodi, must sabi tish wel-wel and get patient wit stubborn pipol. 25 E must dey gentol as e dey koret pipol wey dey opoz en

prishin. May bi God go let dem turn from sin kom mit am, so dat dem go no di trut. 26 Den dia sense go koret and dem nor go fal enta devol trap again. Bikos devol don kash dem put insaid en trap bifor and den dem dey du enitin wey e wont.

Revelashon 3:17-19 'Bikos yu dey sey, "I get plenti moni and I nor nid enitin!" Bot yu nor no sey yor kondishon bad wel-wel, yu dey sofa; yu poor, blind and naked. 18 'So I advise yu sey mak yu buy gold; gold wey dem don polish wit fire. Den yu go get plenti moni. Mak yu stil buy white klot from mi kon wear am, so dat dem nor go si yor nakednes again, den buy medicine put for yor eye, so dat yu go fit si. 19 'I dey koret and ponish enibodi wey I luv. So mak yu dey serious kon turn from sin kom mit God!

2 Sekon Korintians 7:10 Bikos wen God mak pipol sori for di sin wey dem komit, dem go turn kom mit am, den God go save dem and dem nor go rigret again. Bot di vesnashon wey dis wold dey bring, na deat dey end am.

1 Fest Kings 18:37 - God turn heart back to God

2 Sekon Korintians 4:4 bikos doz wey nor biliv, di gods for dis taim don blind dia maind, so dem nor go si lite wey dey dis gospol wey get glori and dis gospol na Kraist wey bi God image.

Luk 8:11-15 "Na wetin di parabol min bi dis: Di sid na God wod. 12 "Di won wey fal for road, na di pipol wey hear God wod, bot devol kon tif am from dia heart, so dat dem nor go biliv and God nor go save dem. 13 "Di won wey fal for wer stones dey, na di pipol wey hear God wod kon risiv am wit hapines, bot dem nor get root. Dem biliv smol, bot wen wahala kom, dem nor biliv again. 14 "Di sid wey fal for shuku-shuku, na di pipol wey hear God wod, bot wahala, plenti propati and jolli-jolli for dis wold kon shuk dem, so di frut nor ivun ripe. 15 "Bot di sid wey fal for beta groun, na di pipol wey hear God wod, hol am wit beta maind, dey obey God and bear wahala, so dem kon bear plenti frut."

Apostols 15:11 "Wi biliv sey God save us tru grace wey kom from Jisos Kraist, jos as E du for dis Gentai pipol tu."

Roman 8:13 Bikos if una dey folo sin, una go die. Bot di Spirit pawa go kil all di bad tins wey una dey du, so dat una go get life.